
ЁШЛАР: БИЗГА ШУ ЕР ЁҚДИ!

Мана бир неча кундан буён Фарғона вилояти ҳокими Шухрат Ғаниев, вилоят бошқарма, идора ва ташкилот раҳбарлари жойларга чиқиб ёшлар билан учрашмоқдалар. Бу галги мулоқотлар бутунлай ўзгача бўлди.

“Қўқон” эркин иқтисодий зонасидаги корхоналарда очиқ эшиклар куни тарзида Қўқон шаҳри ва Учкўприк тумани ёшларининг бўш ишчи ўринлари билан танишувидан бошланди.

Шухрат Ғаниев ва тадбиркор корхона муассислари ишчиларга яратилган шарт-шароитлар, иш ҳақи, транспорт қатнови, овқатланиш ва дам олишгача бўлган барча масалаларда ёшларнинг саволларига жавоб бердилар.

Йигит-қизлар бир нечта корхоналарнинг иш фаолияти билан танишиб, шу ерда меҳнат қилаётган ишчи-мутахассислар билан мулоқотда бўлдилар.

Шундан сўнг “Қўқон” ЭИЗ бош офисида вилоят ҳокими Шухрат Ғаниев ёшларнинг савол ва таклифларига жавоб берди. Ҳар бир мурожаат, муаммо ва илтимослар шу ернинг ўзида ҳал қилинди.

Жумладан қўқонлик ёшлар:

-Ўринов Иқболжон таклифи билан “Президентнинг 5 ташаббуси” бўйича вилоят ҳокимининг мукофоти учун танлов ўтказиш;

-Қўқон шаҳрида “Ёшлар Пресс-клуби” ташкил этиш;

-Ёшлар Иттифоқи таркибида “Ёшлар медиа маркази” очиш учун вилоят бюджетидан 1,5 млрд сўм ажратиш;

-Шаҳардаги бекатларни “WIFI” билан жиҳозланган “Ёшлар бекати”га айлантириш;

-Ёшлар, талабалар учун жамоат транспортида имтиёзли йўл карталари таъсис этиш;

-“Қўқон” ЭИЗ да доимий бўш ишчи ўринлари ярмаркаси ташкил этиш каби таклифлари ижро учун қабул қилинди.

Учкўприклик ёшларнинг таклифи билан “Қўқон” ЭИЗ ҳудудида имтиёзли кредит асосида иккита 7 қаватли арзон уй-жойлар қуриладиган бўлди. Учкўприк марказида ёшлар кинотеатри, болалар учун сузиш ҳавзаси, касб мактаби ва бошқа қатор ижтимоий объектлар қурилиши ҳамда таъмирланишига маблағлар ажратилди.

“Ҳазиний издошлари” республика ёш ижодкорлари форуми ўтказишга қарор қилинди.

Ёш спортчиларнинг таклифи билан Учкўприкда болалар бадий гимнастика мактаби ташкил этиш ҳақида кўрсатма берилди. Учрашув чоғида ўқувчи ёшларнинг илтимосига кўра вилоят ҳоими Шухрат Ғаниев Учкўприк ва Қўқон шаҳридаги мактаблар учун 400 та компьютер мажмуаси ажратилганини эълон қилди.

Шунингдек, Қўқон шаҳар Ёшлар Иттифоқи кенгаши жамғармасига 1,5 млрд сўм маблағ ажратилди. Қўқондаги 3 та олий юртининг ҳар бирига “ISUZU” автобуслари совға қилинди.

Шу куни юздан зиёд йигит-қизлар “Қўқон” ЭИЗ даги корхоналарга доимий ишга қабул қилиндилар.

2020-01-08 12:02:01